

元史新編

元史卷二十六

列傳十二

開國文臣

岳璘

哈赤北魯

塔統阿

岳璘

舊連帖穆爾號

回鶻人由唐以來世爲畏兀國相家僕輦傑

河上故子孫遂爲僕氏十餘傳至此理伽普華年十六襲

國相荅刺罕岳璘之兄也時西契丹方強威制畏兀命太

師僧少監來臨其國驕恣用權畏兀王患之謀於此理伽

對曰能殺少監挈吾眾歸大蒙古國彼且震駭矣遂率眾

圍少監斬之以功受封賞左右有忌其功者譖於王曰少

監珥珠先王寶也此理伽匿之益急索勿失王怒索寶甚

急此理伽度無以自明乃亡附太祖賜以金虎符師紐銀

印金螭椅各一衣金直孫校尉四人仍食二十三郡賜銀

五萬兩以弟岳璘爲質岳璘年十五精畏吾書從太祖征討多戰功命爲皇弟幹眞師傅訓導諸王子以孝弟敦睦仁厚不殺爲先帝聞而嘉之從平河南徙鄯縣民萬餘戶入樂安俄授河南等處軍民都達魯花赤佩金虎符所得上方賞賚悉輦歸故郡以散親舊且盛陳漢官儀衛以激厲國人道出河西所過榛莽或時乏水爲鑿井置墩居民使客相慶稱便太宗卽位以中原多盜選充大斷事官從幹眞出鎮順天等路布德化寬征徭盜遁姦革州郡清寧尋復監河南等處軍民卒謚莊簡子合刺普華見忠義傳哈赤北魯畏兀人也哈刺奔氏性聰敏習事國王月仙帖木爾亦都護聞其名自梭里彌國徵爲斷事官月仙卒子八出阿忒亦都護年幼西遼主鞠爾可汗遣使據其國且

召哈赤北魯至則以爲諸子師八出阿忒聞太祖明聖乃殺西遼使更遣阿憐帖木爾都督等四人使西遼阿憐帖木爾都督者哈赤北魯婿也具語以其故於是與其子月多什野納馳歸太祖一見大悅卽令諸皇子受學焉仍令月多什野納以質子入宿衛從帝西征至別什巴里東獨山見城空無人帝問此何城也對曰獨山城往歲大饑民皆流移之它所然此地當北來要衝宜耕種以爲備臣昔在校里彌國時有戶六十願移居此帝曰善遣月多什野納佩金符往取之父子皆畱居焉後六年太祖西征還見田野墾闢民物繁庶大悅問哈赤北魯則已死矣迺賜月多什野納都督印章兼獨山城達魯花赤月多什野納卒子乞赤宋忽在太宗時襲爵賜號荅刺罕子四人曰塔塔

爾曰忽朶曰火思蠻曰月思蠻世祖命火思蠻從雪雪的斤鎮雲南月思蠻事憲宗襲父爵兼領僧人後因軍帥札忽台據別什巴里盡室徙居平涼與其子阿的彌什入覲世祖詔入宿衛爲必闡赤命從安西王芒哥刺出鎮六盤安西王薨其子阿難荅嗣成宗卽位遣使入朝因奏阿的彌什父子本先帝舊臣來事先王服勤二十餘載若終老王府非所以盡其才願以歸朝廷詔授阿的彌什汝州達魯花赤積官祕書太監卒子阿鄰帖木爾善蒙古書多聞識歷事累朝由翰林待制累遷翰林學士承旨英宗時以舊學日侍左右陳說祖宗以來及古先哲王嘉言善行翻譯諸經紀錄故實總治諸王駙馬蕃國朝會之事天厯初北迎明宗入正大統一見歡甚顧左右曰此朕師也天厯

三年進知經筵事子沙刺班累拜中書平章政事

塔統阿

舊作塔  
塔統阿

者亦畏兀人聰慧善言論深通本國文字

乃滿大陽可汗尊之爲傳掌其金印及錢穀太祖西征乃滿國亡塔統阿懷印逃去俄就禽帝詰之對曰臣職也將以死守欲求故主授之耳帝曰忠孝人也問是印何用對曰出納錢穀委任人材一切事皆以爲信驗帝善之命掌印居左右是後凡有制旨始用印章以其深知本國文字命教太子諸王以畏兀字書國語太宗卽位命司內府玉璽金帛命其妻爲皇子哈刺察乳母又聞其廉介數加禮賜以疾卒至大三年追封鴈門郡公子四人長玉笏彌什次力渾彌什次速羅海次篤縣玉笏彌什少有勇力渾都海叛於六盤時玉笏彌什守護皇孫脫脫營壘率其眾與

渾都海戰敗之追至只必勒與阿藍荅合兵復戰死之力  
渾彌什有膂力嘗獵於野與眾相失遇三盜盡搏仆之而  
縛以還帝召見選力士與角無敵者令備宿衛速羅海襲  
父職司內府玉璽金帛篤縣舊事皇子哈刺察世祖卽位  
從其母入見欲官之以無功辭命統宿衛奉使遼東卒封  
鴈門郡公子阿必寶哈陝西行省平章

舊史與哈赤北魯  
皆專傳今移附

劉敏

李楨

劉敏字有功宣德青魯人歲壬申太祖師次山西敏時年  
十二從父母避地德興禪房山兵至父母棄敏走大將偉  
其貌收養之一日帝宴諸將於行營敏隨入帝召問所自  
俾畱宿衛習蒙古語閱二歲能通諸部語帝嘉之賜名玉  
出于出入禁闥初爲奉御從帝征遼西及回回諸國癸未

授安撫使便宜行事兼燕京路徵收稅課漕鹽等事立兩軍戍燕置二總管府以敏從子二人佩金符爲二府長命敏總其役賜玉印佩金虎符奏佐吏宋元爲安撫副使高逢辰爲僉事李臻爲參謀初耶律楚材總裁都邑契丹人居多其徒往往中夜挾弓矢掠民財官不能禁敏戮其渠魁令諸市又歸豪強冒籍良民爲奴者興學校進名士爲之師己丑太宗卽位改造行宮幄殿乙未城和林建萬安宮設宮闈司局立驛傳以便貢輸既成宴賜甚渥辛丑春授行尙書省詔曰卿之所行有司不得與聞俄而牙魯瓦赤自西域回至燕奏與敏同治漢民帝允其請已而不相能帝聞之罷牙魯瓦赤獨任敏復辟幕府李臻爲左右司郎中丙午定宗卽位詔敏與奧都剌同行省事辛亥夏六



月憲宗卽位召赴行在所仍命與牙魯瓦赤同政甲寅請以子世亨自代又命其子世濟入宿衛帝伐宋幸陝右敏輿疾請見以中原土曠民貧勞師遠伐恐非計帝弗納旋卒年五十九

李楨字榦臣其先西夏國族子也金末楨以經童中選旣長入爲質子以文學得近侍太宗嘉之賜名玉出干爲必閣赤從皇子闊出伐金帝命軍事訪楨以行及下河南諸郡闊出遣楨往唐鄧二州數民實兵餘歲凶流散十八九楨至振恤饑寒歸者如市十年從大將察罕下淮甸奏訪天下儒士令所在優贍之十三年師圍壽春天雨不止楨言於察罕曰頓師城下暑雨疫作將有不利且城久拒命破必屠之則生靈何辜請退舍數里身往招之遂單騎入

敵壘曉以利害明日率眾來降楨表言襄陽乃吳蜀之要衝宋之喉襟得之則可爲他日取宋之基本定宗嘉其言庚戌賜虎符授襄陽軍馬萬戶憲宗命率師巡哨襄樊戊午帝親征召楨同議事秋九月卒於合州年五十九舊史今移

論曰唐書稱黠戛斯直回鶻西北三千里

黠戛斯即元之吉利吉思在和

林正

其文字語言與回鶻正同回鶻在唐時建牙和林

唐書

回鶻牙北六百里得仙娥河即元和林北之

辭靈哥水也一日俛輦傑河今日色棱格河

及其衰也南

徙高昌音轉爲畏吾其舊牙爲乃蠻所據當元之先乃蠻

太陽汗曾尊畏吾塔統阿爲傳西遼鞠爾汗亦召畏吾哈

赤北魯爲諸子師非同文之明驗歟蓋畏吾文字之通於

西域也山來遠矣成吉思初起漠北混沌榛莽初無文字

及滅乃蠻卽進用其遺臣塔統阿敎太子諸王以畏吾字復令諸皇子受學於哈赤北魯又命岳璘爲皇弟幹赤斤師傅皆畏吾文宿也爾時戎馬倉皇朔土初奠首興文治以闢洪荒帝王自有真也太宗以下數世都於和林因俗爲治沿用畏吾字以立官府文書關防會計凡朝廷詔誥臣下章奏莫不用焉世祖雖剗置蒙古新字頒諸學校思有以易之訖不能廢也至元延祐之世復立回回回回字與畏吾國子學百司庶府皆設回回譯史然賜蒙古諸王色目諸臣以通鑒諸書亦必以畏吾字轉譯而後頒焉蓋以習尙旣深先入爲主不如是或莫曉也元代諸帝之通漢文者惟明孝太子與文宗其下諸臣之習此者亦不及畏吾文字之盛文宗將幸上都命錄御衣於簿顧左右無能書

漢字者末造如此開國可知夫一代之興制度典章必有  
所因以爲損益元代之習尙畏吾文字也其所因者漸非  
一朝一夕之故矣岳璘訓導諸王子以孝弟敦睦仁厚不  
殺爲先是其文字雖異而其爲教也固無悖於聖經大道  
者歟

○原藁無  
論今補

元史卷二十六終

元史卷二十七

列傳十三

平金功臣

烏乎元之削平女真用兵一世然自拖雷木華黎速不台數大將出蒙古勦族外類皆驅金臣以攻金即用金臣以守金而文臣如耶律姚許寶劉先未膺金一命後未貽金一矢者尙不在列焉自古楚材晉用叢爵淵魚未有如斯之甚者舊史四十餘傳今并爲十有一尙有趙迪杜豐邸順邸琮田雄石抹孛迭張拔都純只海鮮卑仲吉劉亨安高宣趙柔之屬無足表見附姓名於此

石抹耶先

子查刺

膺魯華撒吉思不華

趙瑄

石抹耶先

一作石抹阿辛

遼人其先爲述律氏號稱后族遼亡改

述律爲石抹氏其祖庫烈爾誓不食金祿率部落遠徙父

脫羅畢察爾亦不仕耶先其仲子也年十歲從其父問宗國所以亡卽大憤及長善騎射多智略豪服諸部金人聞其名徵爲奚部長卽讓其兄贍德納曰兄姑受之爲保宗族計遂深自韜匿居北野山射狐鼠而食聞太祖起朔方匹馬來歸首言東京爲金開基地蕩其根本中原可傳檄而定也太祖悅命從太師國王木華黎先取北京舊史作東京案東平王世家太祖命木華黎取遼西是北京非東京也師過臨潢次高州亦距北京大寧近而距東京遠與舊傳不合師過臨潢次高州木華黎令耶先率千騎爲先鋒耶先曰兵貴奇勝何以多爲謀知金新易北京畱守將至耶先獨與數騎邀殺之懷其誥命至謂守門者曰我新畱守也入據府中問吏列兵於城上何爲吏以邊備對耶先曰方今中外晏然柰何陳兵以動搖人心卽命徹守備曰寇至

在我卽夜下令易置將佐部伍三日木華黎至入北京不

費一矢定城邑三十二得戶十萬八千兵十萬資糧器械

山積耶律雷哥傳書乙亥雷哥破東京又太祖本紀七年

克之皆與此不合祕史作哲伯襲降守臣寅荅虎等四十

七人本華黎傳乙亥破北京守將寅荅虎舉城降則此尋

移師圍東京久不下及城破將屠之耶先曰王師拯人水

火彼旣降而復屠則未下者人將死守天下何時定乎既云

城破並未言降何云先降復屠疑亦謂北京爲東京分一事爲二事之故奏請赦之授御史大

夫領北京達魯花赤耶先果先得東京何不使守東京而

史無一字金人喪其根本始議遷河南時石天應與豪酋數十

據興中府耶先分兵降之奏以爲興中尹又命監張鯨等

軍征燕南未下州郡至平州鯨稱疾不進耶先執送行在



鯨訴稱實病非敢叛帝命以其弟張致爲質鯨諾而宵遁

耶先追戮之張致已殺使者應其兄矣張致伏誅耶先籍

其私養死士萬二千人號黑衣軍者上於朝

所將軍皆猛士衣黑爲號

故名詔以御史大夫提控諸路元帥府事舉遼水西灤水

東悉以付之

耶先果得遼東何朝廷但以遼西地付之而遼東反不付乎

後從木華黎

攻蠡州先登中石死子查刺亦善射襲御史大夫領黑衣

軍戊寅從木華黎攻平陽太原陽吉岢嵐諸郡下之遂攻

盩厔都久不下及降眾欲屠其城查刺曰殺降不祥且得空

城將安用之由是遂免己卯詔以黑衣軍分屯真定固安

太原平陽隰吉岢嵐諸郡及南征盡以黑衣軍爲前列敗

金將白撒官奴於河渡河再戰盡殪之長驅破汴入自仁

和門收圖籍而還論功黑衣軍爲最帝悉以諸軍俘獲賜

之癸巳從國王塔思攻金帥宣撫萬奴於遼東之南京城  
堅如立鐵查刺分兵佯攻其東北而率親兵突其西南奮  
槩先登眾軍乘之而進遂克之辛丑授真定北京兩路達  
魯花赤癸卯卒於柳城年四十有四子庫祿滿襲職中統  
三年從征李璫中流矢卒子良輔襲黑軍總管後世多貴  
顯

膺魯華蒙古部克烈氏一曰槩直膺魯華

槩直卽槩赤官  
名元人多連官

爲名也

初以所部從太祖征乃蠻西夏有功命將萬人爲木

華黎前鋒下金桓州得其監馬幾百萬匹分屬諸軍軍勢  
大振歲辛未破遼東西諸州唯東京未下獲金使遣往諭  
之膺魯華曰東京金舊都備嚴而守固攻之未易下以計  
破之可也請易服與其使偕往說之彼將不疑俟門啟繼

以大軍則可克矣卒如其計徇地河北攻大名小大數十戰城垂陷中流矢卒武宗時贈太傅追封衛國公諡武敏子撒吉思不華嗣將父軍太宗元年己丑賜金虎符安輯河北山東諸州監史天澤軍于真定金徙汴立河平軍於新衛以自固恃爲北門數攻之不拔壬辰正月太宗自白坡濟河而南睿宗由峭石灘涉漢而北撒吉思集西都水之舟渡白河陰取鄭金哀宗勢蹙出奔河北帝命撒吉思追躡之走其節度斜念阿卜遂據有新衛十二月金主自黃陵岡濟河謀復衛撒吉思破其將白撒于白公廟俘斬萬計復追金主于歸德薄北門而軍引河灌之水入舊睢河城四面皆水轉不能攻乃退屯亳州癸巳四月金將官奴僞遣人約降而夜來斫營火攻四起腹背受敵撒吉思

一軍皆沒命其弟明安荅領其行營明安荅善騎射從征  
淮安因糧於敵軍士免負擔之勞咸樂爲用憲宗時從昔  
烈門大孫南伐死於釣州子腓虎從世祖北征叛王挺戈  
出入其陣帝壯之賜號拔都初太宗旣滅金命大臣忽都  
虎料民分封功臣撒吉思妻楊氏自陳曰吾舅及夫皆死  
國事而獨見遺邪詔賜新衛民二百戶贈撒吉思不華太  
師諡忠武明安荅太保諡武毅爵皆衛國公

趙瑁雲中蔚州人父昆仕金爲帥府評事兄珪以萬戶守  
飛狐城昆卒珪輦其母如蠡州畱瑁於飛狐癸酉太祖南  
伐先鋒至飛狐率眾降木華黎駐兵桓州署爲百戶從攻  
蠡州金兵閉城拒守裨將石抹耶先戰死木華黎怒將屠  
城瑁泣曰母兄皆在城中乞以一身贖一城之命木華黎

義而許之從攻相州抵其門死士突出瑄直前擊之流矢  
中面鏃出腦後拔矢再戰七日破其城論功授冀州行軍  
都元帥讓其兄珪朝廷從之改授瑄易州達魯花赤太宗  
下河南瑄輸矢二十餘萬至行在帝大喜命權中都省事  
癸巳趙揚據興州叛瑄進軍平之遷中山真定二路達魯  
花赤卒封定國公諡襄穆子秉溫事世祖潛邸命受學於  
太保劉秉忠從征吐蕃雲南大理中統初詔行右三部事  
至元七年勅習朝儀閱試稱旨授祕書少監購求天下祕  
書遷昭文館大學士知太史院侍儀司事皇慶元年卒封  
雲國公諡文昭

蕭乃台

烏耶爾

安札爾

耶律涅爾

闊闊不

蕭乃台

蕭一作肖  
一作笑

徒伯怯烈氏以忠勇侍太祖時木華黎

博爾朮旣立爲左右萬戶帝命蕭乃台佩金符領蒙古軍  
屬木華黎麾下爲先鋒金降將武僊殺史天倪以眞定叛  
僊弟質軍中者一夕遁去蕭乃台遣其弟追斬於紫荊關  
俘其妻子而還乃率精甲三千與史天澤合兵進圍中山  
敗其將葛鐵槍援兵乘勝進擊遂克中山取無極拔趙州  
僊棄眞定走天澤入城撫定其民未幾僊潛結水軍爲內  
應夜開南門納僊復據其城蕭乃台倉卒以步兵七十踰  
城奔藁城遲明部曲稍集兵復振再襲破之僊棄城遁將  
士怒其反覆欲屠城蕭乃台曰此皆爲敵帥驅脅何罪之  
有若不勝一朝之忿徒堅他城不降之心遂皆釋之乃進  
兵下太原略太行拔長勝寨尋出太行山東敗宋將彭義  
斌追斬之于火炎山進定東平又與芒古不華徇河北懷

孟諸州從國王李魯定諡都已復渡河略汴京徇睢州敗金將完顏慶山奴于陽邑圍金主於蔡州與史天澤攻城北面汝水阻其前結筏潛渡血戰連日金亡朝廷以其功多命併將史氏三萬戶軍以圖南征賜東平戶三百官爲治第分撥牧馬草地以老病卒于東平歸葬漠北子抹兀荅及兀魯台皆有戰功孫脫落合察亦從渡江伐宋官至懷遠大將軍

烏耶爾

一作吾也而一作烏葉兒一作烏野爾

珊竹氏狀貌甚偉腰大十圍

父曰圖魯華察以武勇稱太祖五年烏耶爾與大將哲伯克金東京有功九年從木華黎取北京爲先鋒授北京總管都元帥畱鎮其地金將達魯以惠州漁河口爲隘有眾數萬圖復北疆烏耶爾擊斬之又討平趙守玉於興州十

一年又破張致於錦州十五年從木華黎征東平馳赴陷陣生挾二將以還征延安矢中右股力戰破之進取葭鄜克鳳翔兼下河西諸地二十一年從郡王帶孫圍益都越二年下三十餘城太宗元年入覲命與撒里荅征高麗下十餘城高麗王懼請和遣其子縛入質帝大悅俾充北京東京廣靈益州平州泰州開元府七路都元帥憲宗元年召問東夷事對曰臣雖老倘藉威靈指麾三年敵國猶可克況東夷小醜乎帝壯其言問飲酒幾何對曰唯所賜時有一駙馬都尉在側素以酒稱命與角飲帝大笑賜錦衣名馬俄謝病歸七年復來朝帝憫其老謂曰太祖時宣勞諸臣獨卿無恙賜賚甚厚以都元帥授其中子阿海八年秋夜中星隕帳前光數丈有聲明日卒年九十有六有石



抹孛迭爾者契丹人歸太祖於雄州隸木華黎麾下命與  
元帥烏耶爾分領錦州紅羅山北京東路漢軍二萬又從  
徇地山東大名又從定山西授霸州都元帥令兵士屯田

且耕且戰數年城市復完聚

舊史石抹孛迭爾專傳今并附

安札爾

安一作按

拓跋氏嘗扈從太祖南征歲丙子復從定諸

部有功命領蒙古軍爲木華黎前鋒兵臨燕遼營青齊魯

趙韓魏皆下歲己卯河中府降木華黎北還以安札爾領

前鋒總帥仍統所部兵屯平陽以備金攝國王事時金將

乞石烈氏擁重兵數爲患然畏安札爾威名不敢輕犯其

境壬午元帥石天應守河中府屯中條山金將侯小叔率

昆弟兵十餘萬夜襲河中天應遣權府吳澤率兵五百出

東門伏兩谷間諭令俟其半過卽翼擊之俾腹背受敵會

澤醉敵至援弗繼城遂陷天應死焉遂燔其城將趨中條  
安札爾進兵擊之斬首數萬癸未春木華黎卒於聞喜其  
子孛魯襲爵令安札爾居守平陽庚寅孛魯由雲中圍絳  
州金將武仙退保潞東十餘里原上孛魯馳至沁南未立  
鼓乞石烈引兵襲其後孛魯戰失利輜重人口皆陷沒安  
札爾妻奴丹氏亦被獲拘於大梁金主聞安札爾威名召  
奴丹氏謂之曰今縱爾還能偕爾夫來乎當厚賞爾奴丹  
氏佯諾之遂得還太宗聞而嘉之詔預其夫前鋒事從征  
潞州鳳翔至鈞州三峯山破金將完顏合達兵十五萬明  
年壬辰春帝班師北還命偕都元帥梭伯台圍汴城中識  
安札爾旗幟懼曰其妻猶勇且義況其夫乎甲午金亡詔  
封功臣賜平陽戶六百子孫世其職

耶律涅爾契丹人世爲遼臣遼亡祖父皆不仕金涅爾生而膂力過人沈毅有大志聞太祖舉兵率其黨百餘人詣軍門獻十策帝召見與語奇之賜名賽因使備宿衛又問爾生何地對曰霸州因號霸州元帥佐木華黎取北京下高利興松義錦等二十六城破五十四寨從大將烏耶爾稠幹爾討錦州張致出奇兵掩擊斬之功第一進取遼東西廣寧金復海蓋等十五城從攻東平延安圍鳳翔裏創進攻丹延木華黎止之對曰創未至死敢自逸耶木華黎壯之與以所乘白馬明日介其馬飾以朱纓簡驍衛七十人與金兵戰木華黎乘高見其馳突萬眾中曰此霸州元帥也諸軍繼進金兵敗走丹延十餘城皆降從帝征河西取甘合辛蛇等州師還復從木華黎之弟帶孫攻益都下

萊膠淄等三十二城卒追封興國公諡武毅子邁奴蚤從父習戰陣初入見太祖問曰汝年小能襲父爵乎對曰臣年雖小國法不小帝異之曰此兒甚肖乃父授高州達魯花赤兼征行萬戶命攻高麗花涼城監軍張翼劉霸都隕於敵邁奴怒曰兩將陷賊義不獨生趣出戰破之誅其渠撫安其民進攻開州州將金沙密逆戰禽之遂下龍宣雲泰等十四城從諸王按赤台征女真萬奴部有功未幾召還興州趙祚挾土豪楊買奴等以叛從親王察合台進討圍之於險樹寨三月不下邁奴令健卒卽寨北小徑上大樹以繩潛引百人登寨潰之買奴投崖死餘黨悉平太宗初從再征高麗取西京而還加征東大元帥卒封興國公諡顯懿孫元臣年十六入宿衛爲怯薛必閣赤襲千戶將

其父軍從伯顏平宋有功至元十四年只爾瓦台叛圍應昌府元臣以所部軍馳擊破賊魚兒灤救出皇女魯國公主公主奏請暫畱元臣鎮應昌以安反側居三歲帝以所籍入權臣家婦賜之元臣辭曰臣家世清素不敢自污帝嘉歎不已復從征乃顏征湖廣溪洞蠻獠皆有功卒封興國公諡忠靖

闊闊不花者按攤脫里氏木華黎伐金分探馬赤爲五部各置將闊闊不花爲五部前鋒都元帥所向輒克然不嗜殺故所至無殘破略定濱棣諸州俘獲焦林諸處民四百餘但籍其姓名遣歸鄉里徇益都下之悉以財物馬畜分賜士卒從太宗渡河攻汴梁歸德分兵渡淮攻壽州不下射書城中諭之城中人感泣以綵輿奉金公主開門送款

闊闊不花下令軍士入城虜掠者死城中帖然公主哀宗之姑也太宗命五部將分鎮中原闊闊不花鎮益都濟南安札爾鎮平陽太原孛羅鎮真定蕭乃台鎮大名怯烈台鎮東平括其民匠得七十二萬戶以三千戶賜五部將闊闊不花得分戶六百立官治其賦得薦置長吏歲從官給其所得五戶絲以疾卒于官子黃頭代領探馬赤爲元帥

劉伯林

子崑

石天應

劉伯林濟南人好任俠善騎射金末爲威寧防城千戶太祖圍威寧伯林縋城降仍以原職爲都提控命選士卒爲一軍與大傅耶律圖花同征討招降山後諸州太祖嘗言漢人來歸者以伯林爲首太祖北還畱伯林屯天成遏金兵前後數十戰進攻西京錄功賜金虎符以本職充西京

畱守兼兵馬副元帥癸酉從征山東攻梁門遂城下之乙亥同木華黎攻破燕京丁丑復從大軍攻下山東山西諸州縣時論欲徙聞喜民實天成伯林以北地喪亂人艱於食力爭止之盡縱所俘虜萬計在威寧十餘年務農積穀與民休息鄰境凋瘵而威寧獨爲樂土嘗曰吾聞活千人者後必封吾之所活何啻萬餘人子孫其有興者乎辛巳卒年七十二累贈太師封秦國公諡忠順子疑

疑字孟方始生時家有白馬產黑駒故小字黑馬後遂以小字行驍勇有智略年幾弱冠隨父征伐大小數百戰嘗獨行遇金兵圍本部十三人卽奮劍入圍盡拔十三人以出歲壬午襲父職爲萬戶佩虎符兼都元帥癸未從國王木華黎攻鳳翔不克又從孛羅攻西夏唐兀甲申從按陳

那衍攻破東平大名乙酉金降將武僊據眞定以叛從李  
羅討破之歲己丑太宗卽位始立三萬戶以疑爲首重喜  
史天澤次之授金虎符充平陽宣德等路管軍萬戶從征  
回回河西諸國及破鳳翔西和沔州諸城堡庚寅皇弟拖  
雷入自大散關假道於宋以伐金由興元金房東下戰三  
峯山乘勝攻破香山寨及鈞州皆疑爲先鋒賜西錦良馬  
貂裘以旌其功會增立七萬戶仍以疑爲首復從破南京  
破蔡州乙未同都元帥荅海紺卜征西川辛丑改授都總  
管萬戶統西京河東陝西諸軍萬戶夾谷芒古台田雄等  
竝聽節制入覲帝慰勞之賜銀鼠皮三百爲質孫衣尋命  
循撫天下察民利病應州郭志全反脅從誑者五百餘  
人疑止誅其首惡癸丑從憲宗至六盤山命守商州禦宋



兵丁已入覲請立成都以圖全蜀帝從之就命管領成都新舊軍民小大諸務中統元年廉希憲商挺宣撫川陝時密力火者握重兵居成都跋扈慮其爲變以疑有膽智使乘驛矯詔竟誅之其子訴於朝世祖諭之曰朕命也勿復言三年命兼成都路經略使卒于瀘州封秦國公諡忠惠子十二人元振元禮從征蜀有功別附平蜀諸臣傳

石天應字瑞之興中永德人知書善騎射爲鄉里所歸謁木華黎于軍門授興中府尹俾從南征造戰攻具機變神捷所將兵旌旗色黑人目之曰黑軍前後二百餘戰皆身先士卒累功遷右副元帥從木華黎征陝右假道西夏自東勝濟河南拔葭州因進說曰西戎雖降實未可信此州富強控扼大河當金夏之衝脫爲敵軍所梗緩急非便宜

命將守之多造舟楫以備不虞此萬全計也木華黎然之表授陝西河東路行臺兵馬都元帥以勁兵五千畱守葭蘆遂造舟楫建浮橋諸將多言水漲波惡恐勞費無功天應下令敢阻者斬橋成諸將悅服分兵四出悉定葭綏地一日謁木華黎於汾水木華黎諭以進取之策天應謂河東西皆平川廣野可以駐軍規取關陝當守河中而畱部于葭綏或諫曰河中雖用武地南有潼關西有京兆皆金軍所屯且民新附其心未一守之恐貽噬臍之悔不如由葭綏取鄜延可以萬全天應曰國家之急本在河南葭州路險地僻轉餉甚難河中北接汾晉西連同華地五千餘里戶數十萬若起漕運以通餽餉則關內可刻期定關內既定長河以南在吾目中矣吾年垂耄恐功名爲他人所

先男兒要當死戰陳以報國耳秋九月遂移軍河中既而金軍果潛入中條來襲天應先遣驍將吳澤伏兵要路約候敵至前後夾擊澤勇而嗜酒是夕方醉臥林中金兵已由閒道偪城下時兵燼後守具未完新附者爭縋而去敵乘隙入城舉火天應左右僅四十餘騎皆曰吳澤誤我或勸西渡河天應曰吾違眾議而南遷今事急棄去是不武也何以見同列俄敵兵四合飲血力戰至午死之時天應弟天禹子佐中在軍中伺敵少懈倒抽其斧反斫之突城而出渡河趨木華黎行營求得蒙古軍數千回與敵戰敗之木華黎嘉其勇奏授金符行元帥子安琬襲職佩金符從征大理討李璫皆有功江西分寧叛安琬往討之賊背山而陳安琬引兵出陳後賊驚潰安琬揮兵直壓壘門賊

揚言曰願少容成列而戰死且不憾安琬稍引卻賊果出  
陳安琬突陳而入大呼曰吾止誅賊首庸卒非我敵也手  
刃中賊背生禽之累功至右衛親軍副都指揮使卒又有  
田雄者石天應之偏裨也從攻蜀歸鎮關中皆有功

舊史田雄

專傳今并附

### 石抹明安

王職 何實

石抹明安桓州人童時嘗騎杖爲馬令羣兒前導行列整  
肅無敢譁者父老知其必貴歲壬申太祖兵破金撫州將  
遂南向金主命招討紇石烈九斤來援時明安在其麾下  
九斤謂之曰汝嘗使北方素識蒙古國主可往臨陳問舉  
兵之由不然卽詬之明安初如所教詆責而去俄策馬來  
降帝命縛以俟戰畢詰之曰爾何詈我而後降對曰臣素

有歸志不聽其指使則見疑何由瞻奉天顏帝善而釋之命領蒙古軍撫定雲中東西兩路帝欲休兵北還明安諫曰金有天下十七路今我所得惟雲中東西兩路而已然山前民庶久不知兵今乘其震驚之時長驅破竹傳檄可定若更休兵待彼徐繕守備并力而守則未可歲月取也機不可失請乘之帝卽命明安引兵南進所至民皆牛酒犒迎盡有河北諸郡復偕三合拔都將兵由古北口徇景蔚檀順諸州有抗命者諸將議欲屠之明安請生之以招未附師次通州降金右副元帥蒲察七斤明安遂軍於京南建春宮金臣李英等領兵護餉援中都明安將五百騎邀之遇於永清甫交綏佯北金兵來追迴擊大破之獲李英得糧千餘車遂招諭永清不降拔而屠之未幾金將完

顏合住阿興松哥復以步兵萬二千糧車五百兩援中都  
明安復將三千騎邀之涿州盡得其輜重還屯建春宮尋  
克萬寧宮取富昌豐宐二關拔固安縣金中都丞相完顏  
復興飲藥死城中官吏父老開門降明安發粟振之悉籍  
其府庫金帛以聞一無所取詔加太傅邵國公兼管蒙古  
漢軍兵馬都元帥卒子二人長咸得卜襲職爲燕京行省  
以貪暴稱次忽篤華太宗時爲燕京行尙書省事兼兵馬  
都元帥

王楫字巨川鳳翔虢縣人弱冠舉進士不第乃入終南山  
讀書涉獵孫吳泰和中詣闕上書論當世急務金主俾給  
事縉山元帥府尋用元帥高琪薦特賜進士出身授副統  
軍守涿鹿臨太祖將兵南下楫鏖戰三日兵敗見執太祖

詰責之神色不變對曰臣以布衣受恩誓捐軀報國今既  
僨軍得死爲幸帝義而釋之授都統令招集山西潰兵從  
破紫荆關取涿易等州擢宣撫使從石抹明安南征下古  
北口薊雲順等州得漢軍數萬遂圍中都中都降檣請禁  
虜掠以慰民望令城中民與城外軍通糴易故士得金帛  
而民獲粒食索軍回所驅牛以給農民民復業者眾又從  
明安招諭保定新城信安雄霸文安清滄諸城皆望風款  
附乃置行司於滄州以鎮之時河閒清滄復叛從駙馬李  
圖討之遂復河閒得軍民萬口李圖惡其反覆欲盡誅之  
檄解之曰驅羣羊使東西者牧人也羊何知哉殲其渠魁  
足矣釋此輩遷之近縣強者從軍弱者爲農此天所以畀  
我也何以殺爲李圖曰能保其不復反邪檄卽具文保任

之俱得全活時都城廟學燬於兵檝重剗於舊樞密院地  
春秋率諸生行釋菜禮仍取舊岐陽石鼓列廡下從征西  
夏及秦州夏人盡徹橋梁爲備軍阻不得前諸將束手檝  
夜督士卒運木石比曉橋成軍得濟戊子奉監國公主命  
領省中都屬盜起信安轉掠近縣檝引水環城調度經費  
自券諸賈人而斂不及民遂討平諸盜壬辰從攻汴京癸  
巳奉命持國書使宋宋遣使報聘檝前後凡五往反和議  
未決而卒於南宋人重賙而歸其柩葬燕子六人

何實字誠卿其先北京人父道忠仕金爲北京畱守實少  
孤依叔父居及長通諸國譯語驍勇善騎射當中原盜起  
錦州張鯨自立爲臨海王旣納款尋以叛伏誅鯨弟致初  
以叛謀於實實厲聲叱曰天之厯數在朔方汝恣爲不軌



徒自斃耳乃籍戶口一萬募兵三千丙子春來歸大將木  
華黎與論兵極稱賞遂引見太祖獻軍民之數帝大悅命  
從木華黎充前鋒與張致軍遇於神水縣陷陣死戰獲戰  
馬兵械甚眾以功授帳前軍馬都彈壓詔木華黎攻齊東  
而實帥師四千取燕南齊西之地首擊邢州徇趙郡取魏  
鄴下博關襲曹濮恩德泰安濟寧勢如破竹薄濰州與木  
華黎會遷兵馬都鎮撫從取大同雁門石隰等州引兵略  
太原平陽河中京兆諸城所向款附以功授元帥左監軍  
武仙復叛據邢實帥師五千圍之立雲梯先登橫稍突之  
城破武仙走實下令禁剽掠士民安堵遂戍邢州分兵攻  
汴陳蔡唐鄧許鈞睢鄭毫潁所至有功賜金虎符便宜行  
元帥府事邢因武僊之亂歲屢饑請移匠局于博博值兵

火後物貨不通實以絲數印置會子權行一方民獲賈遷之利朝太宗於幄殿賜坐與論軍中故事欲授以征行元帥實叩頭以右臂受創不能舉辭許之授以漢字宣命充御用局人匠達魯花赤子孫世其爵

### 按竺爾

按竺爾雍古氏其先居雲中塞上父黜公爲金羣牧使驛所牧馬來歸太祖命仍其官按竺爾幼鞠於外祖朮要甲家譌爲趙家因姓趙氏年十四從皇子察合台大獵有二虎突出再射殪之由是以善射名從太祖西征尋思千阿里麻里等國以功爲千戶從征積石圍河州破臨洮攻德順鞏昌皆有功駐兵秦州太宗卽位尊察合台王爲皇兄以按竺爾爲元帥從皇兄鎮剛丹州自燉煌置驛抵玉關

通西域從定關隴圍鳳翔按竺爾分兵攻西南隅城上礮石亂下選死士先登拔其城斬金將劉興哥分兵攻西和州宋將彊俊領眾數萬堅壁清野以老我師按竺爾率死士罵城下挑戰俊怒率眾出陳按竺爾佯走俊追之因以奇兵奪其城伏兵要其歸轉戰數十里斬首數千級禽俊餘眾退保仇池進擊拔之從攻平涼慶陽邠原靈皆降涇州復叛殺守將郭元恕眾議屠之按竺爾但誅首惡師還原州降民棄老幼夜亡走眾曰此必反也宜誅之以警其餘按竺爾曰此輩懼吾驅之北徙耳遣人諭之謂汝等若走以軍法治罪父母妻子併誅夷汝歸保無他明年草青具牛酒迎師於此州民皆復歸土豪陳苟集數千人潛新寨諸洞眾議以火攻之按竺爾曰招諭不出攻之未晚遂

偕數騎抵寨縱馬解弓矢召苟遙語折矢與爲誓苟黨羅拜皆降金守潼關攻之不克皇弟拖雷分兵由山南入金境按竺爾爲先鋒趣散關宋人已燒絕棧道復由兩當縣出魚關軍沔州乃假道於宋興元制置使桂如淵曰宋讎金久矣何不藉我兵鋒一洗國恥今欲假道南鄭由金洋達唐鄧會大兵以滅金豈獨爲吾之利亦宋之利也如淵度軍已壓境勢不徒還遂遣人導師武休關東抵鄧州西破小關金人大駭其守帥完顏合達伊刺蒲阿帥兵數十萬相拒於鄧我師不與戰直趣鈞州與親王按赤台合陳三峯山下會天大雪金兵成列按竺爾先率所部精兵迎擊於前諸軍乘之金師敗績癸巳金主奔蔡從圍蔡金亡初金將郭斌自鳳翔突圍出保金蘭定會四州至是命按

竺爾往取之圍斌於會州食盡將走敗之子城門兵入城巷戰死傷甚眾斌闔門死之按竺爾命保其遺孤遂定四州金將汪世顯守鞏州皇子闊端圍之未下遣按竺爾等往招之世顯率眾來降皇兄嘉其材勇賞賚甚厚賜名拔都拜征行大元帥丙申大軍伐蜀皇子闊端出大散關分兵令宗王穆直等出陰平郡期會於成都按竺爾領礮手兵爲先鋒破宕昌殘階州攻文州數月不下謀知城中無井乃奪其汲道率勇士梯城先登拔之因招徠吐蕃酋長十族皆賜以銀符略定龍州遂與大散軍合進克成都師還成都復叛宗王議以漢陽當隴蜀之衝宋及吐蕃利于入寇宜得良將以鎮之遂分蒙古千戶五人隸按竺爾麾下以往按竺爾命侯和尚南戍沔州之石門朮魯西戍階

州之兩水謹斥埃嚴巡邏西南諸州不敢犯從元帥塔海率諸翼兵伐蜀克隆慶攻重慶圖萬州宋人將舟師數百艘逆流迎戰按竺爾順流率勁兵乘巨筏浮草舟於其間弓弩雨射宋人不能敵敗諸夔門辛丑伐西川破二十餘城成都守將田顯開北門以納師獲宋制置使陳隆之所之進拔漢州明年會大軍連破遂寧瀘敘資等州後又赴秦中安輯涇邠二州既而階文復叛憲宗卽位召按竺爾還舊鎮遣將直擣江油平之世祖中統元年親王阿里不哥遣其將阿藍荅渾都海圖據關隴帝遣宗王哈丹哈必赤阿曷馬西討時按竺爾已委軍於其子至是曰今內難方殷浸亂關隴豈臣子安臥時邪吾雖老尙能破賊遂引兵出刪丹之耀碑谷與大軍合戰會大風晝晦戰至晡大

敗之斬馘無算按竺爾與總帥汪良臣獲阿藍荅渾都海等捷聞帝賜璽書褒美賜弓矢錦衣四年卒封秦國公諡武宣子十人徹理國寶取知名徹理襲職爲元帥嘗從父攻瀘州降宋將劉整宋將姚德壁雲頂山大軍圍之徹理率部兵由水門先登破其壁國寶從父軍中軍務悉以委之攻重慶并掠合州以歸中統元年阿藍荅裨將火都據吐蕃之點西嶺國寶攝帥事討之曰此窮寇也宜少緩以計破之遂以精兵襲其後據險要其西走挑戰不出斂兵自固相持兩月潛兵出其不意禽殺之捷聞賜弓矢金綺及按竺爾告老兄徹理襲行元帥病不視事國寶乃遣弟國能持金帛說降吐蕃酋長入覲奏請城文州屯兵鎮守招降扶州諸羌酋長圖山川形勢以獻詔授其酋長爲萬

戶千戶賜國寶金幣至元四年卒追封梁國公諡忠定子世榮襲職世延別見中葉言臣傳徹理子步魯合達至元間平蜀取嘉定重慶及征金齒皆預有功授征行元帥雲南萬戶府達魯花赤

舊史步魯合達別傳今并附

史天倪

子楫

王善

弟子樞

從弟天祥

王守道

王

義

王

史天倪字和甫燕京永清人曾祖倫少任俠因築室發土得金始饒於財建家塾招徠學者所保全豪士及陷俘士族甚眾歲祲發粟八萬石振饑子成珪有父風當金末盜起悉散家財以俠稱於河朔孫秉直好讀書尙氣義歲癸酉木華黎統兵南伐所向殘破惟降者得免乃率鄉里數千人詣涿州軍門降木華黎欲大用秉直秉直辭乃以其子天倪爲萬戶而命秉直屯霸州遠近來附十餘萬家尋



遷之漠北降人道饑秉直分以所賜牛羊全活甚眾從下  
北京詔以烏耶爾爲北京路都元帥秉直行尙書六部事  
主餽餉卒年七十一子三長天倪次天安次天澤天澤自  
有傳天倪始生之夕白氣貫庭成童姿貌魁傑及長好學  
金大安末舉進士不第從父軍中木華黎見而奇之以萬  
戶統諸降卒從略地三關以南至東海所過城邑皆下因  
進言曰金棄燕遷汴已爲失策遼水東西諸郡金之根本  
若得大寧以扼其喉襟則金雖有遼陽終不能保矣木華  
黎善之先是天倪曾祖史倫卒時河朔諸郡結清樂社四  
十餘每社近千人歲時祠倫守其保甲法至是天倪選社  
勇萬人爲義兵號清樂軍以從弟天祥爲先鋒所向無敵  
分兵略三河薊州諸砦望風款服甲戌朝太祖於燕之幄

殿所陳皆稱旨授馬步軍都統管領二十四萬戶從木華黎攻高州又從攻北京皆不戰而克乙亥授右副都元帥改賜金虎符奉詔南征真定帥武僊固守不下遂移軍圍大名眾謂城堅不可擊天倪使攻其西南角勁卒屢上屢卻天倪先登守者辟易遂破其城會木華黎兵於燕南徇山東中山趙邢威磁洺諸州郡皆下又從木華黎徇河東至絳州其團樓瓮石牢不可破天倪命穴其城旁地虛樓陷遂拔之庚辰還軍真定木華黎欲攻城天祥請曰攻之恐戮及無辜不如先往招諭倘再不從攻之未晚乃往見僊許以名爵僊喜遂降乃以天倪權知河北西路兵馬都元帥武僊副之天倪言今中原粗定而所過猶縱鈔掠非王者弔民伐罪意且王奉天子命爲天下除暴豈可效他

軍所爲木華黎卽下令禁剽虜軍中肅然辛巳降懷潞澤三州壬午破濟南水砦癸未徇山西遂克三關不浹旬兵至河衛喜曰河衛者夷門之限也河衛旣破則夷門豈能守乎時嚴實以兵來赴請自攻河衛天倪曰完顏合達及蒲瓦亦勅敵也實輕敵固請當之明日實與蒲瓦兵遇於南門合達兵自北夾攻實兵敗被執天倪曰合達以實歸汴度必在今夕過河亟伏精兵延津渡口果夜縛實過伏起截擊奪實歸未幾帝命天倪回軍眞定宋大名總管彭義斌犯河朔天倪逆戰於恩州敗之乙酉師還聞武僊之黨據西山腰水鐵壁二砦叛天倪直擣其巢掩殺之僊怒謀作亂乃設宴邀天倪至刺殺之天倪之赴眞定也秉直密戒之曰觀武僊辭氣終不爲我用宜備之天倪曰我以

赤心待人人必不相負願無慮府僚王守道亦曰僊位居公下意每不平豈能鬱鬱久居此宜先事爲備亦不聽天倪死前一日擊鞠夜歸有大星隕馬前有聲心惡之尋果及禍年僅三十九妻程氏聞亂恐汚於賊乃自殺子楫權從秉直先歸北京得存

楫字大濟歲壬寅天澤引楫入見太宗奏曰臣兄天倪死事時二子尙幼臣受詔攝行府事今楫已成人乞解職授之帝嘉嘆曰卿此讓固可嘉然朕自有官與之卽以楫爲眞定兵馬都總管請寬包銀之徵立銀鈔相權之法罷運鹽按籍計口給食之令民皆以爲便元氏民有愬府僚於達官者質之無實將抵之死楫力爲營解達官曰是人陷汝僚死地何反抹之楫曰誅之固足懲後未若宥之以愧

其心況人命至重豈宜以妄言故加極刑卒杖遣之中統元年同判宣撫司事楫謹身率先明政化信賞罰任賢良汰貪墨恤勞獨真定所屬三十餘城咸懷其德所舉州縣佐史有文學者三十餘人後皆知名會天澤言兵民之柄不可併居一門行之請自臣家始楫卽日解綬歸弟權亦以萬戶於至元時征宋襄樊有戰功

樞字子明天倪天澤之從子也父天安字全甫初史秉直降木華黎以其長子天倪爲萬戶而質其仲子天安於軍中從略地關右聞天倪被難卽從白雪率眾來會天澤併力破僊命權真定等路萬戶卒樞年二十餘甲寅歲初籍新軍天澤奏樞爲征行萬戶配以真定彰德衛州懷孟新軍戍唐鄧憲宗伐蜀從天澤朝帝於大散關命爲前鋒宋

立劍州僑治於苦竹崖前阻絕澗深數百尺恃險不備帝使樞偵之樞率健卒數十縋而下得其所以致師處急取之宋人懼乃降翼日大宴帝顧皇后命飲樞酒諭曰卿父子世篤忠貞故寵卿殊禮中統初從討李璫於濟南城西南有大澗互歷山樞一軍獨當其險夾澗豎木柵爲城淫雨暴漲木柵盡壞樞計賊夜必乘吾隙命作葦炬數百置城上逮三鼓賊果至擲飛炬照之風怒火烈弓弩齊發賊衆大潰自相蹂躪死者不可勝計未幾璫就禽至元六年高麗人金通精據珍島以叛討之歲餘不下七年進樞鳳州經略使時賊勢方張而炎暑海氣蒸鬱弓力弛弱戰不得力樞分軍爲三多張旗幟以疑之而潛師擣其巢穴大破之其地悉平十二年復以萬戶從丞相伯顏伐宋宋平

官至山東東西道宣慰使

天祥天倪之從弟也天倪父曰秉直天祥父曰懷德隨秉直迎降於木華黎就領其黑軍隸帳下署天祥都鎮撫選降卒勇者二百人使領之招徠丁壯得眾萬餘從取霸州文安大城滄濱長山等城東下淄沂密三州所至皆先登從略地高州拔金源等十五城惟太寧固守不下天祥獲金將完顏胡速木華黎欲殺之天祥曰殺一人無損於敵適驅天下之人爲敵也且當許以不死而殺之無以取信不若從而用之乃以爲千戶復合眾攻其城懷德中流矢卒乃命天祥領其軍乙亥與大帥烏耶爾降金北京畱守銀荅忽等進攻傍近諸寨所得降將皆釋用之命各將舊卒付空名告身使諭二十餘寨悉降得老幼數萬勝兵八

千西乾河蒼魯五指山楊趙奴獨固守不下大小百餘戰  
皆破斬之得戶二萬又與烏耶爾討平興州趙守玉進克  
興中府從木華黎討平錦州張致會契丹漢軍禽關肅復  
利州殺劉祿於銀冶得錦州舊將杜節并黑軍五百人卽  
命統之丙子春覲太祖於魚兒渚授提控元帥遷監軍兵  
馬元帥丁丑夏命權兵馬都元帥蒙古漢軍黑軍並聽節  
制從下河東平陽河中岢嵐絳石隰吉霍等八十餘城還  
師至眞定諭降武僊木華黎乃以天倪鎮眞定而使天祥  
引兵南屯邢西遙水山下仙兄武貴以萬人壁山上天祥  
攜完顏胡速及黑軍百人由鳥道扳援而上潰之仙驚曰  
公殆有羽翼邪從取綬德鄜坊等五十餘城又從攻破青  
龍金勝諸堡得花帽軍五千人皆金精兵也癸未春還軍



命總十二萬戶鎮河中徇西夏破賀蘭山被射傷額庚寅朝太宗於盧朐河以病創乞致仕不允辛卯太宗用兵河南強之從行主漕餉頰骨舊中流矢至是創再發鏃自口出又征西夏時額傷出血過多晚遂喪明而卒天祥幼有大志性不嗜酒喜稼穡好施予乙未括戶縱其奴千餘口俾爲民在軍屢諫屠城所全無算

王守道者爲眞定副帥知金降將武仙有異圖勸天倪爲備不聽及變起守道從史氏昆弟攻復眞定武仙執守道家人以重幣誘之不從卒復仇立功官至五路萬戶又王王者趙州寧晉人長身駢脅多力金季爲萬戶鎮趙州木華黎下中原王率眾降命領本部軍從攻邢洺磁三州濟南諸郡號長漢萬戶從攻澤潞諸州獨潞州堅壁不下王

力戰流矢中左目竟拔其城又破平陽下太原汾代等州  
師還署元帥府監軍以趙州四十寨隸焉從蕭乃台史天  
澤攻敗武仙於眞定生禽宋將彭義斌駐軍寧晉東里寨  
玉家在焉仙遣人齎誥命誘玉妻妻拒曰妾豈可使夫懷  
二心於國家邪仙圍之數帀殺其子寧壽玉聞之領數騎  
突其圍斬獲數百人而還仙遣人追之不敢進乃盡發玉  
先世二十七冢棄骸滿道玉從史天澤諸將擊仙於趙州  
仙糧絕走雙門寨圍之會大風仙獨脫走斬其將四十三  
人眞定遂平加趙州慶源軍節度副使有民負西域賈銀  
倍其母不能償玉出銀五千兩代償之又出家奴二百餘  
口爲良民中統元年卒子忱少宿衛明孝太子東宮授山  
北遼東道按察司副使改河北河南道按察副使鋤豪強

劾蠹吏禁賣奴恤戍軍平反冤獄頗多惠政

王善字子善真定橐城人父增監本縣酒務以孝行稱善資儀雄偉聲若洪鐘尤精騎射金貞祐播遷羣盜蜂起眾推善爲長盜不能犯權中山府治中時武仙鎮真定陰蓄異志忌善威名密令知府李濟府判郭安圖之己卯秋濟安張宴伏兵召計事善覺卽還集帳下士數十攻殺濟安率眾來歸授金符同知中山府事是年冬以兵三百攻武仙仙遣將率精銳二千拒戰善禽斬之仙走獲鹿委其佐段琛城守復戰拔之入據其城軍勢大振自中山以南降州郡四十二遷中山真定等路招討使屯橐城壬午升橐城爲匡國軍以善行帥府事仙窮迫請降詔命復舊鎮善奏仙狼子野心終必反覆請修城隍備之未幾仙果叛率

眾來攻火及西門善出戰卻之追奪其所俘老幼四千仙  
自是不敢復入真定其部曲多來降從征河南至鄭州州  
將馬伯堅素聞善名登陴大呼曰橐城王元帥在軍中否  
願以城降之善直前免胄與語伯堅果率眾出降善令軍  
中秋毫無犯民願從北渡者萬計授土田安集之進河北  
西路兵馬副都總管知中山府事屬縣新樂地居衝要民  
疲供給善均其勞逸所徵或未給輒出家貲代輸又放家  
僮五百人爲民卒封冀國公諡武靖子慶淵爲行軍千戶  
征淮南死次慶端字正甫初爲水軍提領訓練士卒常如  
臨敵敗李璫於老僧口又拒退宋兵於清口從世祖北征  
還進侍衛軍都指揮使建威武營以處衛兵各給田業別  
立神鋒軍親教以蹶張弩技作整暇堂屏利局浚渠構室

如治家事至元十九年改詹事丞時有司欲就威武貸粟數萬石濟饑民裕宗在東宮以問慶端慶端對曰兵民等耳何閒焉卽命與之帝嘗遣近侍夜出伺察爲邏卒所執近侍以實告卒曰軍中惟知將軍令不知其他帝聞賞以黑貂裘及親征乃顏命慶端以所部從時年六十餘與士卒同甘苦夜臥不解衣暇則俾士卒爲軍市自相懋遷成宗卽位拜中書左丞平章政事僉書樞密院事卒

王義字宜之眞定寧晉人少有膽智讀書知大義河朔盜起縣人推義爲長攝縣事尋號爲都統木華黎兵至城下義率眾降入覲太祖授寧晉令兼趙州以南招撫使時兵亂民廢耕所在人相食縣東有藪澤周回百餘里中有小堡曰瀝城有魚藕菱芡之利乃畱偏將李直守寧晉身率

眾保瀝城全活甚眾擣金將李伯祥於趙州宵奪其城授趙冀二州招撫使從大軍南取鉅鹿洺州二城還軍至唐陽西九門遇金軍萬餘北行義伏兵桑林先以百騎挑之因稍卻誘近桑林伏起金兵大亂奔還獲其萬戶李虎拔束鹿深州遷深冀趙三州招撫使束鹿城無樓櫓兵少無糧金將武仙以兵四萬悉銳來攻謂一日可得也義隨機應拒積三十日不能下大小數十戰皆捷一夕義召將佐曰今城守雖有餘然外無援兵糧食將盡豈可坐而待斃率精銳三千銜枚夜出直擣仙營乘暗攻之殺數千人仙率餘眾遁還真定悉獲其軍資器仗庚辰拔冀州行深冀二州元帥府事武仙復遣盧秀李伯祥來襲率戰艦數百艘沿流而下義具舟楫於紀家莊截其下流所部士卒皆

水鄉人善水戰回旋開闔往來如風雨船接則躍登彼船奮戈疾擊敵莫能當殺千餘人進拔瀝城二將西走真定史天澤集諸道兵攻邢州盜趙大王久不能克義引兵薄其城一鼓下之獲其渠餘黨悉平義招散亡勸種藝深冀閒遂爲樂土

張柔

子弘略

何伯祥

張榮張宏

張柔字德剛易州定興人世力農柔善騎射以豪俠稱金貞祐閒河北盜起柔聚族保西山東流寨練伍自衛盜不敢犯郡人張信假柔聲勢納流人女爲妻柔鞭信而還其女信憾之謀結黨害柔未幾信有罪當誅柔救得免壯士多慕義從之金中都經略苗道潤承制授柔定興令累遷清州防禦使道潤表其才加遙領永寧軍節度使兼雄州

管內觀察使行元帥府事繼而道潤爲其副賈瑀所殺瑀遣使好辭來告曰吾得除道潤者以君不助兵故也柔叱使者曰所不滅汝復讎者有如此日檄道潤部曲誓眾復讎眾皆感泣適道潤麾下何伯祥得所佩金虎符以獻因推柔行經略使事事聞加中都畱守兼大興府尹本路經略使行元帥事戊寅元軍出紫荊口柔率所部逆戰狼牙嶺馬蹶被執遂以眾降太祖還其舊職得以便宣行事柔招集部曲下雄易安保諸州攻破賈瑀於孔山誅瑀剖其心祭道潤瑀黨郭收亦降盡有其眾徙治滿城金帥武仙會兵數萬來攻柔以兵數百出奇迎戰大破之乘勝下完州獲州佐甄全全慷慨就戮柔義而釋之且擢爲守使將部曲以從己卯仙復來攻敗走之進拔郎山祁州曲陽降



諸城寨旣而中山叛柔引兵圍之與仙將葛鐵鎗戰於新樂又拒仙兵於滿城柔兩中流矢皆拔矢以戰仙敗走柔略地至鼓城單騎入城喻降之又敗仙於祁州進克深澤寧晉安平分遣別將攻下平棘樂城無極樂城諸縣關地千餘里由是深冀以北鎮定以東三十餘城緣山反側鹿兒野狸等寨相繼降附一月之間與仙十七戰輒勝方獻捷行在而易州軍叛逐其守盧應據西山馬頭寨柔聞之卽棄輜重還出奇計破其寨誅叛者加河北東西等路都元帥賜號拔都魯置官屬將士遷授有差燕帥孱赤台數凌柔柔不爲下乃譖柔於中都行臺曰張柔驍勇無敵向被執而降今委以兵柄戰勝攻取威震河朔失今不圖後必難制常欲殺我我不敢南也行臺召柔幽之土室孱赤

台施帳寢其上環以甲騎明日將般之犀赤台一夕暴死柔乃得免金經略使固安王子昌善戰知名與信安張進連兵阻水爲固柔出其不意徑渡水生禽以還乙酉眞定武仙般都元帥史天倪其弟天澤使來求援柔遣驍將喬惟忠等率千餘騎敗之遂分遣惟忠宋演略彰德洵齊魯聶福堅略青魏山東璽書授柔行軍千戶保州等處都元帥丙戌遣將以兵從國王孛羅攻李全於益都降之丁亥移鎮保州時兵火之餘荒廢十餘載盜出沒其閒柔置市井置廛廨疏溝渠通商惠工遂致殷富遷廟學於城東南增其舊制壬辰從皇弟拖雷伐金語其眾曰吾用兵般人多矣寧無冤者自今非與敵對陳誓不般圍汴京柔軍於城西北金兵屢出拒戰柔單騎陷陳金兵披靡又以兵合

擊金主於河北汴京降柔獨入史館取金寶錄并祕府圖書訪求耆德及燕趙故族十餘家釋金狀元王鶚於俘囚將戮之際衛送北歸又圍金主於睢陽於汝南金人啟南門死戰柔以步卒二十餘突其陳促聶福堅先登又遣張信據其內陞諸軍齊進金主自殺論者謂柔知復故帥之仇而力攻故主於危亡之際大誼安在焉入朝太宗歷數其戰功班諸帥上賜金虎符升軍民萬戶乙未從皇子闊出拔棗陽繼從大帥太赤攻徐邳丁酉詔屯兵曹武以逼宋道山九里關柔率所部先或言關甚險恐有伏不若與大軍俱進不聽以二十騎徑進據關方解甲食而宋兵出兩山閒圍數重眾皆失色柔單騎馳突潰圍大軍繼至遂達曹武悉下緣山諸堡攻洪山寨破之遂營山下偶出略

地宋兵乘虛來襲柔還遇之鏖戰至暮大敗宋師斬其將校十有三人遂會諸軍取光州又進趣黃州破三山寨至大湖中得戰艦沿江接戰壁於黃州西北隅有乘舟出者柔曰此偵者也夜必襲吾不備乃分軍爲三以待之二鼓宋師果至柔遮擊破之溺死者不可計攻其東門矢石雨注柔率死士十餘奮戈大呼所向披靡宋師懼請和乃還以二百騎赴大帥察罕於滁州時廬泗盱眙安豐間宋屯戍相望斥埃甚嚴柔且戰且前凡二十餘戰始至滁察罕以滁久不拔欲解去柔請決戰旣陳與宋驍將遇柔佯卻而反槌擊之墜地宋將忽曳柔轡入其陳飛石中柔鼻兩軍互鬪始得還裹創復戰夜遣兵劫其營焚城東南隅柔銳卒五六十人先登拔之詔以本官節制河南諸翼兵馬

八萬戶會伐宋柔率師自五河口濟淮略和州諸城師還  
察罕奏分部下千人屯田於襄城而柔總諸軍鎮杞初河  
決於汴西南入陳畱分爲三杞居其中潭宋兵乘舟楫之  
便駐亳泗犯汴洛以擾河南柔乃卽故杞之東西中三山  
夾河順般水勢築連城結浮梁進戰退耕敵不敢至會諸  
軍攻破壽州柔欲畱兵守之察罕不從又敗宋師於泗州  
還杞辛亥憲宗卽位改授金虎符仍軍民萬戶甲寅移鎮  
亳州環亳皆水非舟楫不達柔贅城壁爲橋梁屬汴堤以  
通商賈復建孔子廟設校官弟子員詔賜金符九銀符十  
九頒將校之有功者己未分其裨將一從憲宗征蜀一從  
宗王塔察爾攻荆山而自從世祖攻鄂世祖由大勝關柔  
由虎頭關破宋兵於沙窩進敗其守關兵世祖自陽邏渡

江促柔會兵攻鄂百餘日不能下世祖曰吾猶獵者不能禽圈中豕野獵以供汝食汝可破圈取之柔乃令何伯祥作鵝車洞掘其城別遣勇士先登攻其西南陬鄂城垂破會憲宗凶問至宋亦行成世祖遂北還命柔統領蒙古漢軍以俟復命城白鹿磯爲久駐計世祖卽位阿里不哥反世祖北征詔柔班師入衛至盧朐河分其兵三千衛京師遣子弘慶入質二年以金寶錄獻諸朝且請致仕封安肅公命第八子弘略襲職至元四年進封蔡國公卒年七十九諡武康延祐五年加封汝南王諡忠武子十有一人弘略弘範取顯弘範別見平宋功臣傳

弘略字仲傑柔第八子也少通經史善騎射柔旣致仕授弘略金虎符順天路管民總管行軍萬戶仍總諸軍屯亳

者中統三年李璫反求救於宋宋將夏貴自蘄乘虛北奪  
亳滕徐宿邳滄濱七州新蔡符離蘄利津四縣殺守將弘  
略率戰船遏之渦口貴退保蘄弘略發亳軍攻之水陸並  
進宋兵素憚亳軍焚城宵遁追殺殆盡獲軍資不可計盡  
復所失地李璫既誅追問當時與璫通書者獨弘略書皆  
勸以忠義事得釋朝廷懲璫叛逆務裁諸侯權因解弘略  
兵職宿衛京師賜只孫冠服以從宴享至元十三年授淮  
東道宣慰使十四年宋廣王昺據閩廣時東海縣儲粟數  
萬行省檄弘略將兵三千戍之命造舟運粟入淮安弘略  
顧民舟有能載粟十石者與一石人爭趨之一月而畢十  
六年遷江西宣慰使饒州盜起犯都昌與南康止隔一湖  
弘略恐境內有相扇起者乃使人直搗其巢穴生縛賊酋

餘黨潰散下令曰不操兵者皆爲平民餘無所問卒諡忠毅

何伯祥易州易縣人從張柔來歸太祖定河朔惟保定王子昌信安張進堅守不下子昌金驍將也柔命伯祥以兵逼其城禽子昌走張進遂悉平西山諸寨復攻汴梁拔洛陽圍歸德破蔡州論功居最授易州等處軍民總管丁酉從主帥察罕溫德伐宋伯祥拔三十餘柵獲戰艦千餘艘連破山寨器械山積以功賜錦衣金甲壬子諸軍入宋境察罕溫德自他道遽還諸軍倉皇失措伯祥曰退必爲敵所遏不若出不意深入其地使彼不我測遂率兵直抵司空寨疏布營壘陵高伐木爲攻取勢旣夜命爲五營營火十炬伏精銳於險要黎明鼓行而北宋兵果來追伏發驚



潰追擊大破之轉戰百餘里他軍不能歸者皆賴以出世  
祖南伐伯祥從征卒於軍追封易國公諡武昌子瑋別見  
中葉言臣傳

張榮字世輝濟南歷城人狀貌奇偉嘗從軍爲流矢貫背  
拔之不出令人以足抵其額而拔之神色自若金季羣盜  
起榮率鄉民據濟南巒堂嶺眾稍盛遂略章丘鄒平濟陽  
長山辛市蒲臺新城及淄州之地而有之兵至則清野入  
山歲丙戌東平順天皆內屬榮遂版其民五十萬納款於  
按亦台那衍引見太祖問以孤軍數載抗命之故對曰山  
東地廣人稠因守者非人悉爲陛下有臣若但有倚恃亦  
不款服太祖壯之拊其背曰真賽因拔都也授山東行尙  
書省兼兵馬都元帥知濟南府事時賈易用銀民爭發墓

劫取榮下令禁絕太宗時集諸侯議取汴榮請先六軍以清蹕道詔位諸侯上辛卯軍至河上榮率死士宵濟奪戰船五十艘麾抵北岸濟師從攻河南睢陽沛徐邳獲其大將國用安諸將有屢議屠戮所下城者又議欲殺俘虜烹其油以灌城者榮皆力爭止之復從攻宋棗陽仇城六安脫民於兵甚眾時河南民北徙至濟南榮令民間分以田宅課以樹畜曠野闢爲樂土是歲中書攷績第一授濟南路萬戶世祖卽位封濟南公致仕卒子七人皆貴顯孫四十人宏襲爵改眞定府總管平李璫及征襄樊有功至元二年以盜用官物坐罪免元初諸侯各有分邑開府史天澤之於眞定嚴實之於東平張柔之於保定皆地方二三千

里勝兵各數萬競收納賢俊以繫民望及中統建元罷

侯置守諸材萃於朝及分布內外者所在皆是宏雖武人亦喜養士癸巳河南平如前狀元王鶚監察御史樂夔進士敬鉉皆在其門下館客則陵川郝經掌書記則王汝明也汝明本燕人長身美髯議論開爽卓然戰國傑士宏嘗遣之奏軍機於御幄指陳開示如在目中上爲聳動因問曰此若語耶拔都語耶對曰意則拔都語則臣也所交多文士張起巖狀宏行事鋪張功績而元史不載今附其祖榮傳後

嚴實

子忠濟忠嗣  
岳存

張晉亨

趙天錫

王玉汝

嚴實字武叔泰安長清人略知書少豪不治生產喜交接施與落魄里社閒屢以事繫獄俠少輩爲出死力脫之癸酉秋太祖率兵自紫荆口入分略山東河北河東歸金東

平行臺調民爲兵以實爲百戶甲戌春以破泰安賊功權  
長清令宋兵襲破長清實以兵復之或譖實陰與宋結行  
臺以兵圍之實挈家走宋宋以爲濟南治中分兵四出所  
至無不下於是太行之東皆受實節制庚辰三月金河南  
軍攻彰德實請救於宋主將張林林逗遛不行實獨以兵  
赴之比至而城破實知宋不足恃七月挈所部兵及大名  
磁洛恩博滑濬三府六州戶三十萬來歸木華黎承制拜  
實行尙書省事攻下曹濮單三州進取東平壬午宋將彭  
義斌率師克山東郡縣響應遂於乙酉四月圍東平實潛  
約次將李里海合兵攻之李里海兵久不至城中食且盡  
乃與義斌連和義斌亦欲藉實取河朔而後圖之聽實自  
領麾下眾數千七月義斌下真定道西山與李里海等軍

相望分實以帳下兵陽助而陰伺之實知其計遂赴李里海軍與義斌戰史天澤復以銳卒略其後宋兵潰禽義斌不旬月京東州縣復爲實有是冬從木華黎子弟兵取彰德明年取濮東平又明年取三都庚寅四月朝太宗於牛心之幄殿帝賜之坐宴享終日賜以虎符甲午朝於和林授東平路行軍萬戶偏裨賜金符者八人先是實所統五十餘城長東諸侯者十五年至是上雅知實年老不便鞍馬詔毋事征伐初木華黎之弟帶孫攻下彰德怒其反覆欲屠其城實曰此國家舊民吾兵力不能及爲所脅從果有何罪繼復欲屠濮州實言百姓未嘗拒敵豈可與執兵臨陳者同戮不若畱之以供芻秣由是得免者數萬元兵由武關出襄鄧河南俘戮者多實載金緡往贖且約束諸

將毋妄殺掠又多作糜粥以哺難民全活者眾儒士遭兵亂多失業無依實辟其賢者置之幕府修學校招生徒一時名士多以實爲歸實爲合散亡業單貧舉喪葬助婚嫁人尤德之部曲有逃回益都者被獲皆自分必死實置不問王義深者義斌別將實族在東平向爲所害河南破實獲義深妻子厚周卹之送還鄉里人推爲長者太宗十二年卒中統二年追封魯國公諡武惠

忠濟實第二子也襲東平路行軍萬戶統千戶十有七會括新軍山東益兵二萬餘弟忠嗣忠範皆爲萬戶而仍統於忠濟己未世祖南伐詔率師由閒道會鄂忠濟選勇敢二千人爲前鋒甲仗精銳所向無前中統二年召還命忠範代之忠範後持國書使宋行至獨松關爲宋所殺方忠

濟治東平日舉息錢代民納逋賦歲久積多至四十三萬七千餘錠及謝事債家爭持券責償帝聞之悉命發內藏以代東平廟學故隘陋改卜高爽地於城東教養諸生後多顯者幕僚如宋子貞劉肅李昶徐世隆俱爲名臣至元三十年卒後諡莊孝

忠嗣實第三子也少從張澄商挺李楨學略知經史大義初授東平路管軍萬戶從忠濟略地揚州取邵伯埭又從忠濟渡淮分兵出挂車嶺達蘄州及渡江抵鄂分部攻城九十餘日戰甚大師還授金虎符中統三年李璫叛引宋兵攻蘄縣齊魯山寨皆陷忠嗣從大帥按脫救蘄縣復徐州誅叛將李杲哥攻鄒之嶧山滕之牙山多所斬獲賜銀幣四年朝廷懲齊之亂居大藩者子弟不得親政於是

罷官家居十年卒

張晉亨者冀州南宮人其兄顯以冀州數道之眾從嚴實來歸進顯安武軍節度使西征戰沒木華黎署晉亨襲顯爵晉亨涉獵書史小心臨事實器之以女妻焉實征澤潞偏將李信晁海相繼降於宋晉亨跋涉險阻晝伏夜行僅免於難從實子忠貞入質丁亥從國王孛羅征益都有功從實征淮楚河南爲東平路行軍千戶圍安慶攻光之定城略信陽拔六安大小數十戰策功居多實卒權知東平府事憲宗卽位從忠濟入覲時包銀制行朝議戶賦銀六兩晉亨曰五方土產各異隨其產爲賦則民便而易足必責輸銀雖破民之產有不能辦者大臣以聞乃得調戶額三之一仍聽民輸他物遂爲定制帝欲賜晉亨金虎符辭



曰虎符國之名器長一道者所佩臣隸忠濟麾下復佩虎符非制也帝益喜改賜璽書金符授恩州管民萬戶中統三年李璫叛晉亨從嚴忠範戰於遙牆濼勝之改本道奧魯萬戶授金虎符戍宿州首言汴堤南北沃壤閒曠宜屯田以資軍食乃分兵列營以時種藝選千夫長督勸之期年皆獲其利至元十一年從伐宋分道由安慶渡江戍鎮江戰焦山瓜洲皆有功十三年卒子好古好義皆能世其職又齊榮顯者聊城人亦實之女壻也以千戶從外舅來歸攻濠州及五河口屢立戰功

舊史專傳  
今并附

趙天錫者冠氏人太祖遣兵南下天錫自歸於防禦使蘇政政以爲冠氏令乃挈縣人壁桃源天平諸山歲辛巳春歸行臺東平嚴實實素知天錫名擢隸帳下從征上黨以

功授元帥左都監兼冠氏令如故甲申宋將彭義斌據大名冠氏元帥李全降之人心頗搖天錫率將佐往依大將李里海軍未幾破義斌於眞定授左副元帥同知大名路兵馬都總管事李全在大名結其帥蘇椿鄭倜以圖冠氏一日倜以萬人來攻天錫率死士乘城力戰三晝夜破走之卒於冠氏子賁亨襲行軍千戶從世祖渡江攻鄂後又攻襄樊皆有功至元十一年修東西正陽城敗夏貴於淮益以濟南汴梁二路新軍十二年從攻鎮江戰焦山江南平授處州路總管府達魯花赤未行適盜發澈浦行省檄爲招討使率兵平之未幾處州青田縣季文龍章焱殺郡守七縣俱反賁亨率眾圍之賊棄城突走遂復處州招散亡立官府復敗賊眾二萬於惡溪南大將忽都台欲屠城

賁亨曰賊固可般良民何辜將士虜掠子女玉帛杖而還之州民悅服十五年破龍泉縣賊二萬於慶元軍還賊水陸設伏賁亨擇步卒銳者居前賊不敢近改處州路管軍萬戶二十二年還冠氏卒

王玉汝字君璋鄆人金末遷民南渡玉汝奉其親從閒道還行臺嚴實入據鄆署玉汝爲掾史稍遷補行臺令史中書令耶律楚材過東平奇之版授東平路奏差官以事至京師遊楚材門待之若家人父子然實年老艱於從戎玉汝奏請以本府總管代之行夏津災玉汝奏請復其民一歲濟州長官欲以州直隸朝廷大名長官欲以冠氏十七城改隸大名玉汝皆辨正之朝議以嚴實東平地分封諸勳貴裂而爲十各私其入與有司無相關玉汝夜哭於楚

材帳後明日召問故使詣帝前陳愬玉汝曰嚴實以三十萬戶歸朝廷崎嶇兵閒三棄其家室卒無異志豈與他降者同今裂其土地析其人民曷以勸有功邪太宗嘉其忠直由是得不分遷行臺知事仍遙領平陰令辛丑實子忠濟襲職授左右司郎中遂總行臺之政分封諸家以嚴氏總握其事頗不自便定宗卽位皆聚闕下復欲剖分東平地眾心惴惴將聽命玉汝力排之事遂已憲宗卽位有旨令常賦外歲出銀六兩謂之包垛銀玉汝曰民力不支矣糾率諸路管民官愬之闕下得減三分之一累官泰定軍節度使兼兗州管內觀察使充行臺參議以病謝事杜門日以經史自娛忠濟使人謂曰君閒久矣可暫起爲吾分憂玉汝堅辭以參議印強委之不得已起視事僅五六日

裁畫署置煥然一新乙卯八月既望有星隕庭中已而玉汝卒

岳存者亦冠氏人初歸東平嚴實命同張天錫保冠氏曾以死士百餘敗鄭倜兵萬餘於城西又從嚴實敗武仙於彰德西明年又率步騎五百敗金兵萬餘於開州南後任楚丘縣丞數年有惠政卒子天禎襲父職冠氏縣軍民彈壓從圍襄樊先登築正陽東西城造鎮江戰船戰焦山平奉化賊江南平從元帥張弘範觀世祖於柳林授福州路總管平尤溪及永新賊轉遷建康至大二年卒

### 董俊

董俊字用章真定藁城人少力田長涉書史善騎射金貞祐間邊事方急藁城令令立的募兵射上中者拔爲將俊

一發破的遂將所募兵迎敵歲乙亥降於木華黎以勞擢知中山府事金將武僊據眞定定武諸城皆應之俊率眾夜入眞定逐僊收復定武諸城庚辰春金大發兵益僊來攻俊軍於曲陽復敗之黃山下僊窮遂降授俊行元帥府事駐橐城俊言武僊黠不可測終不爲我用請備之木華黎然其言未幾僊果殺都元帥史天倪據眞定以叛旁郡縣皆爲僊守俊提孤軍居反側閒戰士不滿千人拒守橐城僊攻之期年無所利乃縱兵蹂禾稼俊呼語曰汝欲得民而奪之食無道賊不爲也僊慙去俊出兵掩擊敗之已復夜入眞定僊走死乃納天倪弟天澤爲帥壬辰會諸軍圍汴明年金主棄汴奔歸德追圍之金兵夜出薄諸軍於水俊力戰死時年四十有八俊戰必持矛先士卒矢石交

下不動克汴時延儒生持其軸歸教諸子嘗曰射百日事耳詩書非積學不通當戊子歲朝行在所諸將獻戶口各增數要利俊曰民實少而欺以多他日上按數徵求何以應之貽害無窮吾不爲也行元帥府時有狂男子三百餘人期日作亂事覺止戮其渠深冀閒妖人惑眾圖爲不軌連逮者數萬人有司議當族俊力請主者但誅首惡永安節度使劉成叛降武僊於威州俊下令招之盡有其眾沃州民據天臺砦爲盜旣破降之他將利其子女俊曰城降而俘其家仁者不爲也眾皆義不取出行部時見民善治田者必召與歡語情則怒罰之故所部完實民惟恐其去也贈封壽國公諡忠烈改封趙國公子文炳文蔚見平宋功臣傳文用文忠及孫士選守簡見世祖文臣傳

王珣

子榮祖 李守賢

王珣字君寶本姓耶律氏金正隆末避難遼西更姓王氏遂爲義州開義人多力善騎射擊鞠年三十餘遇道士謂曰君相甚奇它日因一青馬而貴歲餘果得一青馬甚駿乘以進退周旋無不如意又嘗行淩水濱得一古刀其背銘曰舉無不克動必成功珣佩之每有警必先鳴及河朔兵動豪強各擁眾據地珣慨然曰世故如此大丈夫當自振拔否則爲人所制乃召諸鄉人諭以自保計眾推珣爲長旬月間招集遺民萬餘歲乙亥木華黎略地奚雪珣率吏民出迎命領義川軍事錦州張致僭號遣兵來掠義州珣卻之復以千騎來衝珣選十八騎突其前復令左右犄角之其眾潰走獲其馬幾盡時木華黎圍興中府召珣全



軍往會致乘虛夜襲殲其家珣以兵復開義進攻錦州致部將高益縛致妻子及其黨千餘人以獻珣但誅致家釋其餘授兵馬都元帥鎮遼東兼義川節度使珣貌黑人呼爲哈刺元帥子四人榮祖襲

榮祖字敬先珣長子也沈厚有勇音如洪鐘珣卒從嗣國王李羅入朝太祖聞其勇選力士三人迭與搏皆應手而倒欲畱置宿衛會金平章政事葛不哥行省於遼東咸平路宣撫使完顏萬奴僭號於開元遂命榮祖還副撒里台進討之拔蓋州宣城等十餘城葛不哥走死復攻拔石城虜生口千餘皆放爲民方城未下時榮祖遣部卒賈寶穴其城城崩被壓眾謂已死弗顧也榮祖曰士忘身死國安忍棄去發石取之猶生一軍感激樂爲效死太宗初授北

京等路征行萬戶易金虎符伐高麗圍其王京高麗王奉表納貢進討萬奴禽之又從宗王按只台平趙祁於興州從唐兀台討祁黨於景蓊間令軍中曰抗我者誅毋及無辜由是免死者眾再從征高麗破十餘城略地三韓詔移鎮高麗平壤榮祖乃募民屯戍闢地千里盡得諸島嶼城堡高麗遣其世子倬出降遂以倬入朝中統元年進沿邊招討使兼北京等路征行萬戶還鎮卒

李守賢字才叔大寧義州人也祖小字放軍嘗從金將攻宋淮南主將分命將校殺所掠俘苟有失亡者罪死放軍當殺五百人皆縱之去金大安初守賢率兄弟歸款於木華黎入朝太祖於行在所卽分命其兄弟爲節度使及副都元帥守賢尋自錦州臨海軍遷河東南路兵馬都總管

太宗南伐道平陽見田野不治詰問守賢以民貧乏耕具對詔給牛萬頭仍徙關中生口墾地河東時河中未下守賢言將士逗留阻撓多所傷溺臣請自北面鑿城先登如其言城果下遂構浮橋明年自蒲津南濟潼關大破趙雄兵於芮城時方會師圍汴畱守賢屯嵩汝金兵十餘萬保少室山大平寨守賢以三千人介其中偵其帥完顏延壽無守禦正月望夕方擊球爲嬉守賢潛遣死士數十緣崖蟻附以登殺其守卒遂大縱兵入破之悉收餘眾以歸不兩旬諸寨望風俱下秦藍帥王祐聚眾數萬據虢之南山憚守賢威略以所部來附關東洛西遂定卒子穀嗣太宗時從征蜀漢攻礪門下萬州會戰瞿塘獲戰艦千餘艘授河東道行軍萬戶定宗卽位之先年復進兵攻成都由廣

元出葭萌度木瓜坡由閒道銜枚疾進襲破其伏兵長驅入成都戊午秋憲宗南伐明年入梁州師次江上造舟爲梁以通援兵且斷宋舟往來之路會江漲梁中絕復破宋舟師萬艘於江中至元七年卒子伯溫見忠義傳

張子良

子懋

王珍

楊傑

奧敦世英

張子良字漢臣涿州范陽人金末四方兵起所在募兵自保燕薊閒田絕耕稼子良聚州人阻水治舟筏取蒲魚自給從者日眾不能容子良乃部勒定興新城數萬口就食東平東平守納之久之守棄東平還汴檄子良南屯宿州又南屯壽州其民爲李全所劫子良走歸宿因以宿帥之眾奪全所劫老幼數萬以還復與宿帥斫其營全失其軍符走死揚州時金受重圍於汴聲援盡絕有國用安者圖



以漣水之眾入援道阻游兵不能進子良與一偏將晝伏夜行得入汴達用安意金君臣以爲自天降也曲賜勞來因以徐宿授子良明年子良進米五百石於汴是時金令已不行於徐宿之間民無耕者出城拾糴糴以食子良嚴兵護之以防鈔掠猝遇敵被重傷乃率其眾就食泗州泗守閱兵將圖之子良與麾下十數人卽軍中生縛其守民不欲北歸者多走旁郡子良資以舟楫無敢掠其財物歲戊戌率泗州西城二十五縣軍民十萬八千餘口因元帥阿朮魯來歸太宗命授京東路行尙書省兼都總帥自兵興以來子良轉徙南北依以全活者不可勝計中統二年命爲歸德泗州總管至元七年改授大名路總管兼府尹八年卒封清河郡侯諡翼敏子懋

懋字之美弱冠侍父子良官京東故懋領其眾從元帥阿  
朮魯軍立歸德府以其軍鎮之至元七年擢濟南諸路新  
軍千戶從破襄樊有功伯顏南征其行陳以鐸車弩爲先  
而眾軍繼之懋以勇鷲將弩前行凡所過山川道路險陬  
通梁筏平塹穿安營設伏出納奇計水陸並進伯顏甚倚  
重之師還駐瓜洲伯顏命懋往諭淮西夏貴副以兩介將  
騎士直趨合肥貴出迎設賓禮懋示以逆順禍福辭旨雄  
厲貴頓首上地圖降還報伯顏大喜復令徇鎮東安豐壽  
春懷遠淮安濠等州郡皆下復使徧諭列城軍民宣布德  
意十三年懋馳驛至上都伯顏上其功授泗州安撫司達  
魯花赤尋同知淮西道宣慰司事未幾又改授吉州路總  
管懋惡衣糲食慎刑平政新府治設義倉部使者劉宣驤

之凡有所懲治朝至夕報豪強竦然郡萬戶蘇良恃勢暴民翼之者有十虎乃劾諸憲府盡誅十虎而黜良又率騎擣盜穴縛其渠遠近流亡來歸者數千家相率爲生祠以祀之十七年卒追封清河郡侯諡宣敏子孫能世其家

王珍字國寶大名南樂人金末喪亂所在盜起南樂人楊鐵槍聚眾保鄉里太祖遣兵攻破河朔鐵槍以兵應之署珍軍前都彈壓鐵槍戰死眾推蘇椿代領其眾復爲宋將彭義斌所破降珍棄家閒道走還軍中復從速魯忽擊走義斌復大名授大名路安撫使俄與元帥梁仲先發兵攻椿克之授兵馬都元帥從刺不台破金將武僊於鄭州復敗金人於蕭縣從大軍攻國用安於徐邳拔之又從伐宋破光州棗陽廬壽滁州常身先諸將奪宋所築五河口新

城乘勝進破濠泗渦口歲庚子入見太宗言大名困於賊調請免逋糧五萬斛已而朝廷議分蒙古漢軍戍河南以珍戍睢州修城隍明斥埃宋兵不敢犯在鎮九年卒子文榦襲職從世祖攻鄂州先登中流矢從討平李璫論功當遷官文榦曰增秩榮止一身賜金則恩逮麾下迺賞以白金二千兩器皿百事雜綵數百縑悉頒給軍士中統三年制父兄子弟竝仕同塗者罷其子弟文榦弟文禮爲千戶文榦自陳願解己官而畱文禮詔從之改遷江東建康道按察使卒篋中錢僅七緡貧不能歸葬云

楊傑小字只哥或連字呼之燕京寶坻人太祖略地燕趙率族屬降附從攻遼左及從定西夏諸部有功己丑從阿朮魯攻信安阿朮魯知其材命裁決軍務信安城四面阻



水其帥張進數月不降傑曰彼恃巨浸我師進不得利退不得歸不若往說之進見其來怒曰吾已斬二使汝不畏死邪傑無懼色從容言曰今齊魯燕趙地方數千里郡邑聞風納降獨君恃此一城內無軍儲外無兵援亡可立待故傑來說君欲使保富貴而免死亡爲君計非爲傑計也進默然曰姑待之凡三往乃降辛卯大名守蘇椿叛討獲之眾議屠城傑曰怒一人而族萬家非招來之道也眾是其言由是滑濬等州聞風納款壬辰師次徐州阻河不得濟傑探知有敵舟伏草澤中率數勁卒憑河擊之悉奪舟楫眾遂得渡獲河南諸郡降人三萬餘戶進攻徐州金將國用安拒戰傑率百餘騎突出陳後返擊大敗之禽一將而還皇大弟國王太祖弟督兵河上見之賜名拔都丁酉

韓赤斤

從阿朮魯攻歸德廐諸將縛草筏渡濠抵城下梯城先登拔之進攻得五州十縣四堡二寨己亥敗宋兵於歸德城率舟師追擊轉戰中流溺死

奧敦世英女真人也奧敦氏其先世仕金爲淄州刺史歲癸酉太祖兵下山東世英及弟保和以州迎降皆授萬戶世英遷德興府尹時金經略使苗道潤率眾欲復山西世英與戰克之將盡殺所俘其母責之曰汝華族也畏死而降此卒伍爾驅之死戰又忍殺之邪遂止世英從數騎巡部定襄卒於軍保和由萬戶屢遷元帥領眞定保定順德諸道農事凡闢田二十餘萬畝改眞定路勸農使致仕子希愷襲勸農使

元史卷二十七終